

УДК 81'373=512.19«18»

*Керим И.А.*

### **ХІХ АСЫРДА КЪЫРЫМТАТАР ТИЛИНЕН БАГЪЛЫ БАЗЫ ЛЕКСИКОГРАФИК ЧАЛЫШМАЛАР**

*Аннотация.* Макъаледе П.И. Кёппеннинъ аля эльязма шеклинде булунгъан къырымтатар тилинен багълы лексикографик чалышмасы (1833) бакъыла. Тильнинъ лексик теркиби козьден кечириле, чешит зенаатларда къулланылгъан келимелер, терминлер, эскирген ве алынма сёзлер талиль этиле. Лугъат тизимининъ усуллары ачыкълана. Фонетика, морфология ве этимология меселелери земаневий тиль нокъта-и-назарындан козетиле.

*Анахтар сёзлер:* ХІХ асырдаки къырымтатар лексикографиясы, билингвизм меселелери, истихсалларда къулланылгъан тиль, алынма сёзлер ве шивелер.

*Керим И.А.*

### **ЛЕКСИКОГРАФИЧЕСКИЕ РАБОТЫ ПО КРЫМСКОТАТАРСКОМУ ЯЗЫКУ В XIX ВЕКЕ**

*Аннотация.* В статье рассматривается словарь крымскотатарского языка П.И. Кёппена (1833). Анализируется лексический состав, выявляется отраслевая и специальная лексика, устаревшие слова, заимствования, разбираются основные принципы составления словаря, проблемы фонетики, морфологии и этимологии применительно к современной лексике.

**Ключевые слова:** крымскотатарская лексикография XIX века, вопросы двуязычия, отраслевая лексика, заимствования, диалектные слова.

Kerim I.A.

## LEXICOGRAPHIC WORKS ON THE CRIMEAN TATAR LANGUAGE IN XIX CENTURY

**Summary.** In the article the dictionary of Crimean Tatar language by P.I. Köppen (1833) is considered. Lexical compositions of this have been analyzed, sectoral and special vocabularies, obsolete words, borrowings are revealed. Basic principles of compiling the dictionary, problems of phonetics, morphology, and etymology are examined in relation to the modern lexicon.

**Keywords:** Crimean Tatar lexicography of XIX century, issues of bilingualism, vocabulary, borrowings, dialect words.

**Меселенинь актуаллиги ве проблематикасы.** Сонъ сенелер ичинде кырымтатар миллий мектеплерине кенишче имкянлар берилип чешит фенлер боюнджа дерслерде вариатив кысымлары айрылганы себебинден терминологик ве билим даллары лексикасынын лугъатлары гъает муим роль ойнамагъа башлады. Ама бойле лугъатлар тиртип этильгенде, дженктен эвель, ве даа терендже далсакъ, инкыляптан эвель тизильген ве базада нешир этильген лугъатларны огренип оларнын сёз зенгинлигинден бугунде де файдаланмакъ меселеси чыкъа. Бугунде кырымтатарджа окъув эснасынын бутюн тарафлары ичюн бу чокъ актуаль ве эмиетлидир.

**Булунгъан ве пейда этильген менбалар.** Интернет, чешит кутюпханелер ве архивлерде сенелердже чалышаракъ бир чокъ янъы менбалар пейда этильди. Меселя, Кёппенинъ 1833–34 сенелери тизген лугъаты бугунде де даа дюнья юзюни коръмейип, ялынъыз эльязма шеклинде булунмакътадыр. Онынъ Санкт-Петербургдаки архивлерде сакълангъан вариантынын сканер копиясынен файдаландыкъ. А.Ч. Кырым-Ховаджанын лугъаты исе, шукюрлер олсун, Гаспринский адына кутюпханемизнин Басыр Гъафар фондунда бунгъаны ичюн оны да копиялап усътюнден чалышмагъа имкянымыз булунды. В.Х. Кондракинин лугъаты та 1864 сенеси нешир этильгенинден, бугунде чокъ сийрек китаплар сырасына кирмекте. Биз онын копиясыны Москвадаки меркезий кутюпханеден къач сенелер эвель алгъан эдик. Булардан гъайры, ишбу сёзлюклернин талилини кечирдигимиз заман эм земаневий кырымтатарджа лугъатлардан, эм тюркче, эм фарсидже, эм де арабча сёзлюклерден сыкъы суретте файдаланмагъа меджбуриетте къалдыкъ.

**Макъаленинъ макъсады** – чокъ сенелер девамында эль токъунылмагъан XIX асырнын лугъатларындаки лексик байлыгъындан файдаланмакъ, ве бу зенгинликнин бугуньки кунюмизге якъынлаштырмакътан ибареттир.

**Эсас малюматнын ачыкъланмасы.**

**П.И. Кёппенинъ лугъаты.** XIX-нджы асырнын биринджи ярысында тизильген кырымтатар тилинен багълы сёзлюклерден энъ меракълысы Пётр Иванович Кёппенинъ (1793–1864) «Татарика»сыдыр. Бу сёзлюк 1833–1834 сенелери язылгъан ёл къайдлары къагъытлары арасында ер алмакъта. Лугъат бугунде аля даа эльязма шеклинде булунмакътадыр. Колеми – ашагъы-юкъары 60 варакъ, яни 120 саифеге якъын олып, Санкт Петербург архивлеринде сакъланылып кельмекте. Эльязманын бир къач саифелери етишмесе де, умумен алгъанда, кырымтатарджадаки лексиканы баягъы кениш суретте акс эте. Ишбу менбанын элимизде булунгъан сканер копиясы ве компьютерде топлангъан нусхасы улькешынас Юрий Беляев ве меслекдешлери тарафындан азырлангъандыр.

П.И. Кёппенинъ озю кимдир? Онъа айт малюматлар интернетте булунмакъта. Ама буларнын чокъусы бири дигерини текрарлагъан къыска малюматлардыр. Ялынъыз сонъ девирде темелли шекильде ишленген кырымлы профессор А.А. Непомнящийнин макъалеси гъает тафсилатлы суретте меселени айдынлатмакъта [1]. П.И. Кёппен 1793 сенеси Харьков шеэринде догъды. Бабасы Екатерина II тарафындан Германиядан чагъыртылгъан 30 немсе хэкимлеринден (докторларындан) бириси эди. Генчлик чагъындан Харьковда

сызмаджылык конторасында чалышып, топрак пайларынын планлаштырылмасынен огъраша. Тамам бу иште алгъан теджрибеси П.И. Кёппенге сонъундаки ильмий чалышмаларында, яни Русиедеки чешит виляетлернин хариталарыны япып нешир этмесинде, чокъ керек ола. Кёппен 1814 сенеси Харьков университетинин магистратурасыны битирип департаментте чалыша.

1819-да почта станцияларынын ревизиясыны япмакъ ичюн ёлгъа чыкып, та Къырымгъаджек сеферде булуна. Къырымны корип бирден онъа мефтун ола. Бу ерде къалып яшамасыны арз эте. Кёппеннин кендиси бу акъта бир китабында бойле язгъан эди: «Объезжая Россию с 1810 года, я в 1819 году имел случай проехать по Южному берегу Крыма и тогда же родилось во мне желание сделаться некогда постоянным жителем той прелестной страны, которой красоты оставили во мне столь живое воспоминание, что и в горах Штирии и Трансильвании я не мог не отдавать преимущества характеру прибрежного хребта Тавриды, пред местами не представляющими взгляда на беспредельную поверхность моря» [2].

Ве, акъикъатен, 1925 сенеси Германияда Тюнингем университетинин фельсефе докторы дереджесини алса да, 1926 сенеси Петербургда Русие Императорлык Академиясына мухбир-азасы сыфатында сайланса да, эп бир 1829 сенеси Къырымгъа кочип 1934 сенеси-неджек, сонъра 1852–1853, 1858–1859, 1860–1864 сенелери Къырымда Алушта янындаки Къарабагъ адлы ерде яшап, бу ерде де 1864 сенеси майыс 23-те кечине. Къырымгъа кочъкенинен, йипекчилик саасында баш инспектор вазифесинде булунгъаны беллидир [3].

Кёппен Къырымгъа севдалыгъы ве садыкълыгъы саесинде мындаки аятны, социаль ве медений дурумны, ярымаданын тарихини ве ерли халкънын тилини огренмеге чалыша ве бу иште баягъы муваффакиетлер къазана. Эм ялынъыз огренмек дегиль де, проф. А.А. Непомнящийнин хаберине коре, Къырым ханлыгъы заманындан къалма бир чокъ ярлыкъларнын истинсахларыны (эль копияларыны) чыкъара, чешит эски акъчалар ве дигер асар-и-атикъаларны топлай [1]. 1831–1838 сенелери арасында тамам Къырымда (Авропада биринджи оларакъ) фенология боюнджа, яни йылнын мевсимлери иле алякъалы табият ве айванатнын тюрленмесини косътерген, тедкъикъатларыны кечирип, нетиджелерини язма шекильде Академиягъа ёллай [3].

«Татарика»гъа, яни къырымтатарджа сёзлюгине келиндже, бунын узеринде аман-аман омрюнин сонъуна къадар чалышып, янъы-янъы къайдлар кирсеткени корюнмекте. Юкъарыда сёзлюк 1833–1834 сенелери арасында тертип этильгенини анъдыкъ. Ама базы сёзлерни анълаткъан вакъытта, чалышма деври баягъы кениш олгъаны айдынлана. Месея, «къайын» («берёза») келимесини анълаткъан вакъытта, дей ки, бу сёз Къырымда олмагъаны алда, дигер тюркий тиллерде корюнмекте, месея, Орта Асиядаки «Джалпакъ къайын» айрыгъы (урочище). Ве бу исбатны Кёппен 1863 сенеси нешир этильген «Отчет Русского Географического Общества» китабына сильтем эте. Эм бойле аллар, яни сенелери 1833–1834-тен сонъраки йылларгъа айт олгъан менбаларны косътермеси, сёзлюгинин метнинде даа растланмакъта.

Сёзлюкнин мундериджеси бойле баблардан ибареттир. 1. (Къырым)татарлар тарафындан къулланылгъан джогърафик терминлер. 2. Озенлер ве айрыкъларнын (урочище) адлары ве иляхри (Таврия губерниясынын шималинде булунгъан бир къач айрыкъ адларынын изаатлары; чешит озенлерде адларнын текрарланмасы: экили ве учлю адлары олгъан озен ве айрыкълар; айрыкъларнын юнанджа адлары; узериндеки бир шейине коре адландырылгъан айрыкълар, ама о шейлер энди олмайып, ялынъыз адлары сакълангъанлар; козылернин тюсюне коре адландырмалар; адландырмаларда харфлернин ер денъиштирмеси ве сёздеки ургъуларнын кочъмеси; даа бошамагъан койлер; янъы ерлешмелер; урум койлери, немсе ерлешмелери). 3. Дюнъя тарафлары ве еллернин (!) адлары. 4. Табият адиселеринин адлары. 5. Вакъыт ве кунъ махаллери, ораза ве байрамлар. 6. (Къырым)татарджа агъырлыкъ тартылары ве ольчулер. 7. (Къырым)татар тюркюси. 8. (Къырым)татарджа шахсий адлар. 9. Айванларнын (къырым)татарджа адлары. 10. Осюмликлернин (къырым)татарджа адлары.

Эбет, Кёппен Къырымдаки ерли тильни бильмегени себебинден, башталары терджиман ярдымына мухтадж эди. Ве сакълангъан весикъалар арасында онын терджиман сораткъ-

аны акъкъында хаберлер де бар [1]. Ама бунынъ иле берабер, эльязмадан корюнгени киби, юнанджа ве дигер европа тиллерини бильгенинден де файдалана, эвельдеки Русие сеферлеринде, Волга бою ве Кавказда япылгъан къайдларыны къуллаана, ве эсас оларакъ, о заманда нешир этилип къолларда юрьген Иосиф Гигановнынъ къазантатарджа лугъатларынен ве франсыз алими Жорж Разиснинъ дёрт къысымлы франсызджа-тюркче лугъатынен иш тута [4]. Булардан гъайры, бир чокъ изаатларында сейяхатчы ве алимернинъ чешит тиллерде олгъан чалышмаларына эсасланып, кенди фикирлерининъ мантигы ве догърулыгыны тасдики этмеге чалыша. Сильтем этилген чалышмаларнынъ муэллифлери бойле сыраны тешкиль этмектелер: Пейсонель, Паллас, Греков, Мухин, Сумароков, Стевен, Караулов, Розенталь, Карамзин, Тунманн, Скальковский ве дигерлери.

Сёзлюкнинъ даа бир меракылы ери шунда ки, бир чокъ келимелер анги койде (ерде) насыл айтылгъаны, не мана бильдиргени, сёзнинъ фонетик ве мана джизинден озелликлери бельгиленгендир. Бунъа коре, земаневий лексиканен къыяс эткенде, чокъ муим ве файдалы нокъталар мейдангъа чыкъмакъта.

**Джогърафик терминлер** сырасына кирсетильген базы келимелерден мисаллер: «къышла» – зимовье; «къабатав» – дремучий лес; «сырт» – хребет; «агъыз» – устье [5]; «богъаз» – пролив; «байыр» – бугор, склон горы; «дарбент» (дербент) – теснина; «тогъай» – огороженная земля; «эгерек» – малая огорожь для овец на яйле, овечий стан; «тёллюк» – место куда собираются овцы, когда котятся; «паланкъа» – форт, редут, бастион; «пёгрenk» (певренк) – трубы для водопроводов; «бунар» (пынар) – ключ, источник; «ирмакъ» – ручеек; «нехир» – река, речка; «хурулу» (хоралы) – загороженное место в лесу, где сеют хлеб; «дере» – ущелье, балка; «яр» (джар) – крутой склон; «йылгъа» (джылгъа) – лощина; «курчи» – соединение ущелий; «ова» (ува) – возвышенная долина, равнина; «гендимала» – татарский лес внутри казенного или общественного; «алачыкъ» – пастбище, лежащее ниже яйлы; «аланчыкъ» – сенокосное место в лесу; «буке» (кой, сала) – деревня; «хортель» – округ; «бурун» – мыс; «улукъ» – желоб деревянный; «къарнис» – малый желоб; «кез» – горная седловина, откос между двумя горами; «топшан» – высокое сенокосное место; «чайыр» – сенокосное место с (фруктовыми) деревьями; «чифтлик» – поместье, усадьба, ферма; «орюш» – выгон; «къош» – загороженное место, где собираются овцы; «текне» – корыто деревянное или каменное пред фонтанами; «истихкям» – укрепление, фортификация.

Бу сырагъа даа бойле эки сёз де кирсетильгендир: «ялакъ» – миска для кормления собак и кошек; «яйлакъ» – плата, взимаемая землевладельцами за пастбища на Яйле. Она заключается обыкновенно в определенном количестве баранов и ягнят с каждого стада.

**Айрыкъ (урочище) ве озенлернинъ адларындан** бойлелери дикъкъат чекмекте: «Къыргъа» – так жители полуострова (например, кувущы) называют места, лежащие за Перекопом, именно Днепровский и Мелитопольский уезды, где у них бывают овцы курдючной породы, именуемые «Чонтух»; «Чонгъар» – так (от слова «Чонгар» – полуостров) называются жители 3-х волостей Перекопского уезда: Джанкойской, Тузакчинской и Эльвугазанской.

Озенлернинъ адларына кельгенде, Къырымнынъ чешит ерлеринден акъкъан озенлернинъ ерли халкъ тарафындан адландырылгъан бойлелери анъылмакъта: «Улу-Узень»; «Корьбек» (Катнарфудан Алуштагъа акъа); «Алма»; «Къача»; «Бельбек»; «Чоргъуна»; «Кебит»; «Буюк-Озен»; «Синап-Су»; «Алабаш-Су»; «Хабарта»; «Къязыкълу».

Бугунде бус-бутюн унутылгъан яхут аз къуллаанылгъан **еллернинъ (!) адларыны** Кёппен гъает тирнекли ве дикъкъатлы шекильде Къызылташ ве Гурзуф сакинлеринден язып алгъан. Булар, эбет, дюнья тарафларынен багълы шекильде берильмекте. Адлар янында алманджа бир харф иле манасына ишарет этсе де, биз толу имлясыны беремиз: «Куньдогъуш» – Ost – 1. Восток. 2. Восточный ветер; «Пориаз» – Noordoost – 1. Северо-восток. 2. Северо-восточный ветер; «Йылдыз» («Сырт») – Noord – 1. Север. 2. Северный ветер; «Къарайль» (Къарасель) – Nn (!) /эльязмада бу шекильде язылгъан, эр алда шимальнен багълы олгъаны корюне/; «Баты» (Куньбаты) – West – 1. Запад. 2. Западный ветер; «Ладоз» – Zuidwest – 1. Юго-запад. 2. Юго-западный ветер; «Къыбла» – Zuiden – 1. Юг. 2. Южный ветер; «Кешлеме» – Zuidoost – 1. Юго-восток. 2. Юго-восточный ветер.

**Эркек ве къадын адлары** топланылып сыра иле берильмекте. Чокъусы бугуньде де къулланылгъан адлар арасында бойле харика сойлары да бардыр. Эркек адлары: Дагъдар, Дервиш, Нурла. Къадын адлары: Арсландже, Севгуль, Ювархан ве иляхри. Бу ерде дикъкъ-атымызны къырымлыларнынъ шакъаджы адетлери де чеке. Базы шакъаджы респондентлер Кёппенге бойле адлар да яздыргъанлар: Чакал, Оксюз, Джампурлос, Обур, Къазыкъ, Шишман (кене дикъкъат этмели: булар лагъап дегиль де, инсан адлары оларакъ бериле).

Бу усулдаки шакъаджылыкъ бундан сонъ да девам эте. «Терджиман»нынъ хаберине коре, 1891 сенеси Никита коюннинъ имамы Абдураман Эфенди джамидеки догъум дефтерине бир баланынъ адыны «Чандалай» деп язгъан. Акъикъатта исе, баланынъ ады «Сулейман» деп къоюлгъан эди. «Мемед-Эмин» оларакъ адландырылгъан дигер баланынъ адыны «Езит» деп дефтерге язгъан. Даа бирисини «Боракъай» шеклинде къайд эткен. Бу алгъа бабалары Неби Мустафа-огълу ве Асан Али-огълу гъает ачувланып газетагъа шикъет яза, ве бу хаталарны насыл шекильде догъуртмакъ мумкюнатыны сораилар [6].

Кёппен къырымтатар тилинен таныша-таныша, ичине дала-дала, атта бойле бир алгъа эмиет берип, манасыны анылатмагъа чалыша: «Часто «м» ставится пред словом, которое повторяется для обозначения «и подобное». Например, «чешме-мешме йохтур», говорит татарин, то есть нет ни фонтана, ни тому подобного. Также «таш-маш», «къале-мале», даже «Бороздин-мороздин».

**Узериндеки осюмлигине коре адландырылгъан айрыкълар**, ама шу осюмликлери энди олмайып, ялынъыз адлары сакълангъанлар арасында бойлелери косътериле: Къутлакъ кою тарафларында «инджир агъач» айрыгъы, «юзюм дерек» айрыгъы; Токълукъ кою тарафларында «ардыч» айрыгъы. Бу айрыкъларда энди не инджир агъачы, не юзюм дереги, не де ардыч агъачы (можжевельник) къалмаса да, адлары бу шекильде сакъланып кельмекте. Айны ал Буюк-Ламбат коюннинъ этегинде ерлешкен Къарагъач (Къара-Агъач) айрыгъына аиттир.

**Табиат адиселери ве оларны козетмек ичюн алетлер** акъкъындаки къысымда ашагъыдакилерни айырмакъ мумкюн: «къуйрукъ йылдыз» – комета; «алла къушакъ» – радуга; «урузгир» (рузгяр) – ветер; «моза» – прибой; «пусула» (пусла) – компас; «дюрбин» – подзорная труба. Сувукълукъ дереджесини косътермек ичюн ольчю адыны сораштырасораштыра буларны огрене. Термометрдеки градус «дирем» (дерем) ве «дередже» сёзлеринен ифаделене. Ама Кёппеннинъ шу ерде анылаткъанына коре, Аянда яшагъан Къасым Дервиш-огълу 1834 сенеси февраль 4-теки сухбетте «дирем» сёзюни ич къабул этмейип, онынъ ерине «грынка» (grynka) сёзю къулланылмакъ кереклигини исбат этмеге чалышкъан, «меселя, хач грынка суух вар?». Яхут «дередже» сёзюни къулланылмасыны теклиф эткен, «меселя: он дередже суух».

**Кунъ девамындаки вакъыт адлары** бугуньдеки киби маналар ташымакъта. Ама базы меракълы шекиллер де корюне. Меселя, «ярын дегюль» (дегиль) – послезавтра; «дюн дегюль» (дегиль) – третьего дня; «хуруздан» (хороздан) – с восходом солнца; «экинди» – четыре часа пополудни; «хушлыкъ» (къушлукъ) – три часа после восхода солнца; «ятсы» – 1<sup>1/2</sup> часа после заката солнца (тамам бу шекильде 1850 сенеси нешир этильген А.Ч. Къырым Ховаджанынъ лугъатында да берильмекте) [7, с. 6]; «къурун» (девир) – столетие («къурун» сёзю аслында арабча «къарн»нынъ чокълукъ шеклидир, яни «асырлар» манасыны ташымакъта) [8, с. 576]; «улурун» (урун) – лето (бу ерде «яз» мевсими – «мейва-махсул джыймакъ» келимесинен ифаделенген [8, с. 888]. Эм эсас сёзде ачыкъ оларакъ метатеза, яни харфлер ерини денъиштирмелери де корюнмекте).

Меракълы шей, бу къысымда Кёппен «кедрелес» (Къыдырлез) – (начало весны) ве «хасым» (Къасым) – (конец осени) байрамларыны аныа, ве Палласкъа сильтем этерек, булар къырымтатарларына юнанлылардан кечкенини айта.

Кене бу къысымда Кёппен ерли къырым халкъы йылда учъ дефа «Намаз» байрамыны кечире – дей. Ве бу байрам аслында олюлерни аныа куню сайылгъаныны айта.

**Къырымда агъырыкъ тартылары ве чешиит ольчулер** къысмында ат-арабанынъ юрюш суръаты саатине 5 вёрст олса, саат ичиндеки месафе «онлама»нен ольченгени дениле. Бунъа коре, бир «онлама» 833 метрлик месафени анылата. Топракъ ольчюсинде («дёньюм» – 10 соток /ар/, ве бунъа коре) чейрекнинъ ярысы «ярым бесери», чейрек олса –

«бакъла» киби келимелер къулланыла. «Къарыш» – пядь земли. Бу сонъкиси шартлы оларакъ терджимедир. «Къарыш» сёзю ве ольчюсини айрыджа анълатаджакъ олсакъ, «къарыш» ольчюси – ачыкъ эльнинъ баш пармагъындан чёнати пармагъынаджек олгъан месафе [9, с. 1024], «пядь» исе, ачыкъ эльнинъ баш пармагъындан ишарет пармагъынаджек олгъан месафе [10, с. 835], «пядь» келимесининъ къырымтатарджасы «шанус»тыр [11]. «Батман» – 18 фунт (о заманда рус фунту – 409,5 грамм эди); «окъкъа» – учь фунт деп косътериле (аслында окъкъа – 1283 граммдыр). Бу ерде бал ольчюсинде къуллангъан «за» келимесини де анъмалы: бир за – 10 кг балдыр. Буны А. Ильмининъ «Къуртчу Бекирчик» икяесинде раст-лаймыз [12, с. 149]. «Адым» – шаг; «аршын» – аршин. Бу сонъки ольчюнинъ де къырымтатарджа ве русчасыны, азбучукъ олса да, айырмакъ керектир. Къырымтатарджа: «чаршы аршыны» 0,68 м, «мимар аршыны» 0,75 м, рус «аршин»ы исе, 0,71 м.

Сёзлюкнинъ колемдже буюк къысыларындан *«Айванат» ве «Осюмликлер» адлары-дыр*. Юкъарыда анъгъанымыз киби, Кёппен къырымтатарджа келимелерни топлап тизгенде, ве тертипке кетиргенде, айны айван яхут осюмликнинъ Къырымнынъ чешит ерлеринде базыда башкъаджа адландырылгъаныны козь огюне алып, керекли вакъытта бир анъламны эки яхут учь келименен бере. Къырымда девамлы яшагъанындан ве ерли тильни авеслик, озенлик ве гъайретле огренгенини, ве бундан гъайры, заманынынъ имкяниетине коре, къошма оларакъ чешит ильмий менбалар къуллангъаны ичюн, берген малюматлары айрыджа инам догъура. Базида къырымтатарджа келименинъ къаршысында русчасы олмайып, ялынъыз латиндже къаршылыгъы булунмакъта. Иште, биз де оларны айны шекильде алдыкъ ве имлясыны сакъламагъа тырыштыкъ. Эм де айрыджа къайд этмели ки, Кёппеннинъ латинджесининъ кучю сёзлюк метнинден ачыкъ корюнмекте. Бу меселеде зенаат саиби олгъаныны ачыкъламакъ ичюн кене хатырлатайыкъ: Кёппен 1829 сенеси Къырымгъа кочип йипекчилик истихсалынынъ баш инспекторы сыфатында чалышкъандыр.

*Айванат* къысмындан базы мисаллер: «хулун» (тай) – жеребенек; «серке» – горный козел; «арсландже» – львица; «каравина» (каравани, джаркъанат) – летучая мышь; «исах» – сплюшка; «къузгъун» – ворон; «къаракъуш» (къаратавукъ) – черный дрозд; «сыйырчыкъ» (сыгъырчыкъ, сызгъырчыкъ) – скворец; «чайыркъуш» – жаворонок; «кукое» (кукуа) – кукушка; «къудектина» – сойка; «бульдирджин» (бодене) – перепелка; «мамуч» (къонъуз) – жук; «бабулхан» – шмель; «чегирче» – саранча; «хархаян» (къыркъаякъ?) – сороконожка; «чигарна» (бий) – паук; «хуртшофла» – ящерица; «чока» (шоха) – гадюка; «бакачана» – зелёная лягушка; «чубарбалыкъ» – форель; «адабалыкъ» – кит.

*Осюмликлерден мисаллер*: «дурдофла» (аювгуль) – пион; «чырмавукъ» (сармашыкъ) – плющ; «кийик асма» – дикая виноградина; «хатынтузлукъ» (экшияпракъ) – барбарис; «шейтанкъарпуз» – каперцы; «татрантамур» – хрен; «юкеагъач» (ахламур, фламур) – липа; «ускюли» (скулю) – лён; «къашыкъагъач» – клён; «юзерлик» – гармала; «шейтантукен» (къаратукен) – держи-дерево; «явурагъач» – черноклен; «кучерес» (сакъызагъач) – терпентинное дерево; «бильбенья» (капарадерек) – *colutea arborescens*; «харыб» (искимчек, кечибойнуз) – рожки /*seratonia*/; «когем» (коген) – тёрн; «копеккирез» – *prunus*; «итбурун» – шиповник; «ябандут» (тукендут) – ожина; «къансиер» (бу осюмлик «къызылчыкъгиллер» сырасына кирмекте) – свидина; «бурюльген» – малина; «табулгъа» – таволга; «кучара» (япышкъан) – боярышник; «будатагъач» – *crataegus melanocarpa*; «кукенея» (коkenaгъач) – *mespilus*; «ахлап» (кертме) – дикая груша; «аджиалма» – кислица; «ювез» – рябина; «фрэнкюзюм» – крыжовник; «къуйрюч» – ясень; «бюрюкозь» – бирючина; «челик» – дикий жасмин; «мамшакъа» – *primulae*; «фесильген» – базилик; «кийикдефне» – *arbutus andrachne*; «таракъагъач» – *viburnum hantana*; «кермени» (кропала) – калина; «къавалагъач» – бузина; «юверия» – *sambucus ebulus*; «къаракъаш» – бархатцы; «къорай» – бурьян; «хампа» – лопух; «юшан» – полынь; «дефине» – лавр; «къаракурпе» – гречиха; «панджар» – щавель; «аткъулакъ» – конский щавель; «кокагъач» – грабина; «пелит» – жёлудь; «оксея» (бик) – бук; «озенагъач» (чарыкъагъач) – ольха; «аджирекагъач» – осокорь; «левка» (кийик сельби) – осина; «акътерек» (къавакыагъач) – тополь белый; «тал» (сугют) – ива, верба; «мисла» – омела; «чам» (нарат) – сосна; «ардыч» – можжевельник; «самла» – черный можжевельник; «истанбулсельви» – кипарис; «сумбуль» – гиацинт.

Мантарлар акъкъында хабер бериркен, Кёппен «фердыша»ны «шампиньон» оларакъ, ве «петыз»ны русчасыны къайд этмеден, бойле тарифлей: «Гриб, который татары едят» /единственный/.

**Нетидже.** Корюнип тургъаны киби, П.И. Кёппеннинъ ишбу сёзлюги нешир этильсе, тилимизнинъ бугунде янъыдан джанланмасы ве инкишаф этмеси эснасында буюк ве эми-етли роль ойнайджакътыр. Заманымызда бир чокъ сааларгъа аит олгъан лексикамызны зенгинлештирмек, керекли вакъытта къыяс этмек, даа догъру, даа айдын оларакъ маналарыны ишлетмек ичюн къулланылмакъ имкяниети булунаджагъы айдындыр. Аслында XIX асыр ичинде къырымтатар тилинен багълы онларнен лугъатлар тизилип, чокъусы нешир этильдилер. Оларнынъ тертип этиджилери ве муэллифлери арасында къырымтатарларындан Абдурахман Челеби Къырым-Ховаджа (лугъатынынъ нешир этильмеси – 1850 с.) ве Абдурефи Эсадулла Боданинский (лугъатынынъ нешир этильмеси – 1873 с.) булунмакъталар. Эки-си де Акъмесджиттеки губерния гимназиясында къырымтатар ве рус тиллеринден дерс бердилер. Келеджектеки тедкъикъатымыз буларнынъ лугъатлары иле багълы оладжакътыр.

#### КЪУЛЛАНЫЛГЪАН ЭДЕБИЯТ

1. Непомнящий А.А. Крымоведческое наследие П.И. Кёппена: Дополнения к известному [Электронный ресурс] / А.А. Непомнящий. – Режим доступа: [www.pandia.ru/text/77/298/96347.php](http://www.pandia.ru/text/77/298/96347.php).
2. Кёппен П.И. Крымский сборник. О древностях Южного берега Крыма и гор Таврических / П.И. Кёппен. – СПб.: Типография Императорской Академии Наук, 1837. – 418 с.
3. Демоскоп Weekly. 220 лет со дня рождения Петра Ивановича Кёппена [Электронный ресурс]. – Режим доступа: [demoscope.ru/weekly/2013/0537/nauka01.php](http://demoscope.ru/weekly/2013/0537/nauka01.php).
4. Гиганов И. Слова коренные, нужнейшие к сведению для обучения татарскому языку, собранные в Тобольской главной школе учителем татарского языка, Софийского собора священником Иосифом Гигановым и Юртовскими муллами свидетельствованные [Электронный ресурс] / И. Гиганов. – СПб., 1801. – 75 с. – Режим доступа: <http://cyberleninka.ru/article/n/slovari-iosifa-giganova-dialektologicheskie-slovari-tatarskogo-yazyka#ixzz3i2KFGW1x>.
5. Терлекчи Б. Крымскотатарско-русский словарь. Факсимильное издание / Б. Терлекчи. – Симферополь: Крымучпедгиз, 2014. – 538 с.
6. Гаспринский И. Письмо из Ялты / И. Гаспринский // Терджиман. – 1891. – 24 марта.
7. Абдурахман Челеби Къырым Ховаджа. Татарско-русский разговорник, с присовокуплением к ним пословиц, басен для склонений и спряжений татарских слов, составленные учителем татарского языка при Симферопольской губернской гимназии / Абдурахман Челеби Къырым Ховаджа. – Казань: Печатано в вольной типографии Н. Коковина, 1850. – 151 с. (Сектор архивных и рукописных материалов КРУ «КБ им. И. Гаспринского: Ф. 1. – Оп. 1. – Ед. хр. 80. – Л. 1–156).
8. Турецко-русский словарь / А.Н. Баскаков, Н.П. Голубева, А.А. Кямилева ве диг. – М.: Русский язык, 1977. – 968 с.
9. Шемседдин С. Къамус-и тюркий / Сами Шемседдин. – 4 баскы. – Истанбул: Гюндогъду матбааджылыкъ, 1992. – 1574 с.
10. Ушаков Д.Н. Большой толковый словарь современного русского языка / Д.Н. Ушаков. – М.: Альта-Принт, 2009. – 1240 с.
11. Керим И.А. Эбу Хайянынъ лугъатлары / И.А. Керим // Янъы дюнъя. – 2015. – № 16(1307).
12. Ильмий А. Эсерлер топламы / А. Ильмий. – Акъмесджит: Таврия, 2004. – 176 с.